

Date – 22/01/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Governor a nih hnua a tum khat nan New Delhi-ah Governor Gen (Dr) VK Singh a zin a, sorkar laipui hotute a dawr nghal.
- All India Presiding Officers' Conference vawi 85-na, Bihara neihah Speaker Pu Lalbiakzaman India Danpui 8th Schedule a Mizo tawng a chuan ve ngei a duh thu a sawi.
- Maharastra chuan World Economic Forum Davos-a neihah MoU chi hrang hrang cheng vaibelchhe 38,750 an ziak.
- Turkey-a ski resort-a hotel kangah mi 66 aia tlem lo an thi a, mi 51 in hliam an tuar.



GOVERNOR

Governor Gen (Dr) VK Singh chuan Governor a nih hnua a tum khat nan New Delhi-ah President Droupadi Murmu, Prime Minister Narendra Modi leh Sawrkar laipua mi pawimawh tak takte nimin khan a hmu a, Mizoram hmasawn nana tul leh pawimawh hrang hrangte a sawipui.

Governor hian President leh Prime Minister-te bakah hian Sawrkar laipua Finance Minister Nirmala Sitharaman, Jal Shakti Minister CR Patil, Petroleum and Natural Gas Minister Hardeep Singh Puri, Environment, Forest and Climate Change Minister Bhupendra Yadav, Labour and Employment Minister Mansukh Mandaviya leh Health & Family Welfare Minister JP Nadda te a hmu bawk a ni.



LENGPUI AIRPORT

Working Committee on Lengpui Airport chuan Indian Airforce (IAF) kuta Lengpui Airport hlan chungchang an bawhzui mek zel a, tun dinhunah draft Memorandum of Agreement (MoA) an buatsaih mek nia thudawn a ni.

Sawrkar hotulu hnen atanga thudawn danin Working Committee on Lengpui Airport hian Cabinet thuchhuak angin IAF hnena Lengpui Airport hlan chungchanga bawhzui ngai awmte an enfel mek a, IAF kutah hian a vaiin hlan vek tur a nilo a, thlawhna tlan kawng (runway) leh Air Traffic Controller te chu hlan tur zinga mi niin adang erawh Mizoram sawrkar kutah ala awm chhonzawm dawn nia thudawn a, Airport enkawl chu a hautak lutuk avangin a chhawk zangkhai theih nan Runway leh Air Traffic Controller chu IAF kutah hlan mai ni se an ti a ni.

Hetihlai hian Mizorama tlawmngai pawl intelkhawm NGO Coordination Committee chuan nikum khan thuchhuah siamin Lengpui Airport chu IAF kuta hlan chhawn rem an tihloh thu an sawi a, Chief Minister hnenah pawh an duhloh thu an thlen tawh a, YMA thukhawmin hemi chungchang an ngaihtuah tur thu an sawi bawk. Tlawmngai pawl bakah hian Eptu party MNF leh Congress te pawhin Lengpui airport chu IAF kuta hlan chhawn rem antih loh thu an sawi bawk a ni.

Mizorama Airport awm chhun Lengpui airport hi Aizawl khawpui atanga kilometre 30 vela hlaa awm a ni a, tun dinhmunah Airline pahnih Indigo leh Alliance Air thlawk mekin kum khatah mi nuai 4 chuang velin an hmang tangkai anga chhut thin a ni a, sum tam tham tak la lut thin mahse a enkawlna a hautak avangin State sawrkar chuan midang kuta hlan relin hmalakna kalpui mek a ni a, amaherawhchu eptu party te leh tlawmngai pawl intelkhawm ten an duhloh thu sawiin sawrkar an nawr ve mek a ni.



SPEAKER

All India Presiding Officers' Conference 85-na, Patna, Bihar a neihah Mizoram Legislative Assembly Speaker Pu Lalbiakzama chuan India Danpui 8th Schedule a Mizo tawng a chuan ve pawimawhna sawifiahin, a tel ve theihna tura thawhpui theuh turin Speaker leh ram hruaitu rual kalkhawmte chu a ngen.

Pu Lalbiakzama chuan India ram chu 'Mother of Democracy' ti a sawi hlawh hial, hnam leh tawng chi hrang hrang infinkhawm 'Unity in the midst of diversity' lo tih theih phahna khawp a ram Dan pui Constitution duang chhuaktute fakawmzia sawiin, he constitution tha leh hlu tak hi vawn him zel a pawimawh thu a sawi a. Sakhaw zalenna chungchangah pawh constitution in a tarlan ang ngei a khua leh tui zawng zawng ten an duh zawng sakhua an zui zel theihna tura constitution vawn him kawngah tan la zel turin kalkhawmte chu a ngen a ni. Hetihruah hian sakhaw zalenna ram ropui ti a sawi thin ram chhung ngeia inrahbehna awm thin chu pawl a tih thu sawiin, Nikum December ni 29- a Howrah, Kolkata, West Bengal a Christian minority-te chung a thilthleng chungchang a sawi lang a. Khami tum a West Bengal Speaker Pu Biman Banerjee hnena a lehkha zia bawhzuia rang taka ani in hma a lo lak avangin lawmthu a sawi a. Inlungruah tak a awm tlang dial dial tur in kalkhawm zawng zawng te a sawm a ni.

Pu Lalbiakzama chuan ram rorelna sang Parliament leh State Legislatures a mipui tan a thil tha tak an lo ruahman thin te tam tak sawi bawkin, chung zingah chuan a bik takin MNREGS leh NFSA te mi nawlpui leh mi hnuaihngungete tan a tangkai em em thu a sawi tel a. India Danpui vawnhimna kawng a Parliament leh State Legislative bodies ten hma an lo lak tawh thinna ah lawmthu a sawi bawk.

All India Presiding Officers' Conference hi ni 2 chhung neih niin nimin khan zawhfel a ni.



WOMEN COMMISSION

Mizoram State Commission for Women ah nikum 2024 chhungin case hrang hrang 81 ziah luh a ni a, heng zingah hian case 71 chin fel a ni.

Mizoram State Commission for Women-a Co-Ordinator Pi Margaret Lalthanthuami sawi danin nikum chhungin case hrang hrang an dawn zinga 71 chu chinfel a ni a ti a, case dang an la chin fel loh 10 te cxhu warrant issue dawna koh theih loh te leh case ngaihtuah mek te a nih thu a sawi.

Women Commission Co-Ordinator chuan District hrang hrang a legal awareness an neih thu sawi in hmeichhia ten an dikna chanvo hria se tih hi chu an auchhuah pui ber a ni a ti a, hmun hrang hrangah mipui hrilh hriat kawngah hma an la thin a ti bawk.

Pi Margaret Lalthanthuami chuan Mizoram hmun hrang hrang atang hmeichhia harsat na nei tan Women Commission chu din anih angin buaina hrang hrang an chingfel tawh a ti a, ukil rawih nana sum tam tak sen tur nei lo pawh hma an lak sak thin thu sawiin hmeichhe dikna chanvo humhim turin hma an la zel tih a sawi bawk.



TRUCK OWNER

Mizoram Truck Owners Association (MTOA) leh Mizoram Truck Drivers Association (MTDA) chuan Vairengte leh Sairang inkar National Highway a chhiat em avang leh nunna atan pawha hlauhawm khawp ani tia sawiin naktuk atangin tlan loh an rel.

MTOA leh MTDA hotute sawi danin Vairengte leh Sairang inkar kawng chu nikum fur laia a chhiat zual lai atangin siam tha turin sawrkar an nawr tawh a, nasa taka an nawr hnuah khaw that huna siam an intiam avangin an tlan chhunzawm a, rei tak khua tha tawh mahse kawng chu siamthat anih theihloh avangin tlan loh mai ni se an ti a, chhun khaw engah pawh kawngpui chu tlan a harsa ta hle a, siam that hma chu tlan chhunzawm loh ni se an ti a ni.

Hetihlai hian All Mizoram Petroleum Dealers Association (AMPEDA) hruaitute chuan truck intelkhawm tlan tumlo mahse an tlan dawn tho an ti a ni.

Supply Department atanga thudawn danin, Mizoramah January thla daih buhfai khawl sa an nei a, furpui huna dah that atan stock kalpui leh mek anih avangin a phurtu truck an din rei chuan an tuar phah thei a ni.

Kawngchhia chungchang sawifiahna vawiin khan sorkar chuan a tichhuak a, PWD chuan Vairengte leh Sairang inkar kawng hi ngaih pawimawh berah neiin a siam hna Jan ni 20 atang khan a thawk a, kawng khuar hnawh leh tuihawk luankawr thlenga siam hna thawkin labour 20 an ruai a ni an ti.

Vairengte leh Sairang kawng (NH54) hi sorkar laipui chuan NHIDCL enkawl turin ti mahse; PWD-in Bilkhawthlir leh Kolasib leh Kawnpui leh Khamrangte a la chang a, hengte hi thawh zawh tawh a ni a, NHIDCL hnena hlan turin an la remchan loh avangin hlan a ni lova, NHIDCL kutah hian hlan fel tum a ni an ti.



CHAMPHAI

Champhai District AH & Veterinary Office huaihawtin nimin khan Bungzung khuaah ‘Awareness Campaign on Animal vaccination cum Animal Health Camp’ neih a ni.

He hun hi Dr. Lalbiakzuala Sailo, District AH & Veterinary Officer in a kaihruai a, Dr. Lalrintluanga Veterinary Officer (MVU) in Bungzung khuaa ranvulhtu lo kalkhawmte hnenah ran hri danna pek pawimawhzia zirtirna a pe bawk. Hemi hnu hian Free Animal Health Camp neih nghal niin ranvulhtute hnenah damdawi chi hrang hrang a thlawna sem chhuah a ni.

Awareness Campaign neih rual hian Vanzau, Bungzung leh Zawngtetui khuaah te Pig Registration chungchang inzirtirna neih nghal a ni a. Vawiin hian Khuangthing khuaah ‘Awareness Campaign on Animal vaccination cum Animal Health Camp’ hi hman leh tur a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



MAHARASTRA

Maharastra chuan World Economic Forum Davos-a neihah MoU chi hrang hrang cheng vaibelchhe 38,750 an ziak. He hunah hian Chief Minister Devendra Fadnavis pawh a tel a. MoU an ziah zingah hian Maharastra sawrkar leh Kalyani Group ten ralthuam, steel leh electric lirthei lama thawhdunna turte a tel a ni.

He thawhdunna tur hian Gadchiroli-ah sumdawna cheng vaibelchhe 5250 chuang a siam ang a. Hna thar 4000 chuang a siam dawn bawk a ni. Heng bakah hian Maharastra sawrkar chuan Reliance Infrastructure Ltd. nen cheng vaibelchhe 16,500 hu MoU an ziak bawk a. He inremna hian hna thar 2450 chuang a siam belh bawk ang.

Balasore Alloys nen MoU ziak bawkin cheng vaibelchhe 17000 hu niin hna thar 32000 chuang a siam bawk ang.



AIPOC

Association of legislative bodies All India Presiding Officers' Conference (AIPOC) inkhawmpui chuan legislative-te rorelnaa buaina awm lo, sawihona tha leh inhnialna awmze nei siam turin thutlukna an siam. Nimin khan AIPOC inkhawmpui hi Patna-ah khar a ni a. Legislative Assembly leh Parliament rorel kaihruiatu rual kalkhawmte chuan resolution panga an pawm a ni.

Conference vawi 85-na tawp ni ah hian Lok Sabha Speaker Om Birla chuan thusawiin Presiding Officer te chu house rorel tibuai thin te chu khap tlat turin a chah a. Kuminah One Nation, One Legislative Forum Mission chu kuminah hian puitlin hman an tum tih sawiin ramchhungah legislative body te chu digital platform khatah an infawkkhawm dawn a ti a. Lok Sabha chuan Artificial Intelligence AI hman kawngah hma a hruai mek a ni a ti bawk.

<><><>

TURKEY

Turkey-a ski resort-a hotel kangah mi 66 aia tlem lo an thi a, mi 51 in hliam an tuar. Thudawn danin he hotel hi Turkey hmarthlang lama Kartalkaya tlanga khualzin thlenna resort a ni a. Hotela thleng mi 230 chu chhanchhuah an ni a. Turkish Interior Minister Ali Yerlikaya chuan in chhawng 12 naa restaurant atangin kangmei hi a intan a ni a ti a. Hetihlai hian Turkish Justice Minister Yilmaz Tunc chuan kangmei chhuah chhan leh thil thlen dan chhui tur prosecutor 6 ruat a nih thu a sawi a ni

<><><>